



UPA 2018/001-01

12-03-2018

**Inatsisartut immikkut ittumik qinersinissaq pillugu Inatsisaat nr. Xx, xx. Xx 2018-imeersoq.**

**(Naalackersuisut siulittaasuat)**

Inatsisartut immikkut ittumik qinersinissaq pillugu Inatsisaattut siunnersuut Partii Naleraq sinnerlugu imannak oqaaseqarfigissuarput.

Miserraticissannngilarput inatsisartut upernaamut ataatsimiinnissatsinnut piareersarluarsimalluta oqa-luuserisassanillu arlalinnik siunnersuutinik piffissaangallartillugu suliaqareersimalluta Naalackersui-sut siulittaasuat qinersinissamik kissaateqarluni tusagassiutitigut nalunaaruteqarmat pakatsingatta, tassami suliarpassuit piareersaaterpassuillu inuiaqatigiinnut aningaasarpassuarnik nalillit maangaan-nartussannngormata.

Minnerunngitsumik aalisarnermut inatsisissatut siunnersuut pingaartumik sinerissamut qanittumi aa-lisartorpassuarnut iluaqusiisussa aammalu aalisakkanik nunatta imartaani pisuussutinik naligiin-nerusumik pisassiisoqartalernissaanik siunertaqartoq maangaannartinneqartussannngormat assut paka-tsissutingaarput uggoralugulu, tassami Partii Naleqqami naatsorsuutigilluinnarsimangaluaratsigu aa-lisarnermut inatsit qinigaaffiup uuma naannginnerani naammassillugu suliarineqarsimanissaa.

Aamma assut uggoraarput timmisartunut suluusalinnut mittarfiit piorsaqqinnissaannut aningaa-salersuinissanut pilersaarutit kinguarsaqqinneqarlutik unitsiinnarneqarallartussannngornerat, tassami takornariaqarnermik inuussutissarsiuteqartut allallu nunami inuussutissarsiuteqartut taamaaliornikkut pilersaarutiminnik piviusunngortitsisinnaaneraluat kinguarsarneqartussannngormat.

Angallanneq nunatta ilarujussuani, pingaartumik tunumi, kujataani, Agto-miik diskobugti, Uum-mannap, Upernaviup Qaanaallu eqqaa ilanngullugu piffissap ilaatigut ajorluinnarsinnaasartoq taamaalilluni aamma kinguarsarneqarpoq.

Naak inupparujussuit angallanikkut akilersinnaasaminnik angalanissamut pisariaqartitsingaluartut, tassami silaannakkut angallannermi pisuut pisortallu akiligaannik angalasut kisimik iluaqu-

serneqassanngimmata, kisiannili aamma pissakinnerit akunnattumillu annertussusilimmik aningaasarsiallit eqqarsaatigineqarluinnartariaqarmata.

Assersuutigiinnarsinnaavarput ilaasunik angallassinissamik isumaqatigiissut atuisunik amerlanerpaanik suli maannamut naammagineqanngeqisoq aammaarluta ukioq kaperlaap nalaani pingaartumik nunatta avannaani angalaniartunut assorujussuaq kipiluttunarsiortitsivoq, tassa ilaatigut quliminguullit Bell 212-it atorsinnaassusaat angissusaallu killeqangaarmata, allaat ukiuni kingullerni arlalinngortuni illersornis-samut qullersaqarfik immikkut akuersitillugu S61-mik tassangaanniit ikiorsiisoqartariaqartarsi-mavoq.

Pissutsit taamaattut ingerlaannarsinnaanngillat – pingaartumillu aaqqiissutissat kinguarsaannarneqarsinnaanngillat, tassami kiffartuussinissamut isumaqatigiissut 30 mio kr-it angullugit aningaasaliiffigeqqinneqaraluartoq aamma ukioq manna taakku qaavisigut immikkut 8 mio kr-it aningaasaliisutigeqqinneqarput, taamaakkaluartorli innuttaasunut suli naammaginartumik aaqqiisoqanngilaq.

Taamaammat pissutsit taamaattut eqqaallugit Partii Naleqqamiit kissaatigisimangaluaqaarput iluarsisassat ajornerpaalluunniit “kivisiinnarnagit” iluarseqqaarlugit qinersinissaq pisinnaassaasoq, tassami kingusinnerpaamik aatsaat 28. November 2018-imi tamanna pisinnaasoq nalunnginnatsigu.

Taama anersaaruluuteqareerluta – taamaattoq qinigaaffiup uuma qaangiutilersut ilaani naalakkersuisooqatigiinnissamik isumaqatigiissuteqarluta suleqataasimanitsinnut qujavugut, minnerungitsumik aamma ukiup uuma aallartinneraniit inermut kallerullu inneranut akit appartinneqarnerat Partii Naleqqamiit suleqataaffigisimagatsigu, tamannalu soorunami atuisunut aningaasaqarnikkut ilorraap tungaasut sunniuteqartussaammat.

Siunnersuutigisarsimasavut immikkut taagunngikkaluarlugit aamma inuiaqatigiinnut suliassaqartitsinermut aningaasarsiornermullu pitsaasumik sunniuteqarsinnaasut amerlanerussuteqartunit akuersissutigineqarsimammata qujavugut.

Naggataatigut eqqaasitsissutigissuarput; Partii Naleqqamiit tamaviaarluta nunatta naalagaaffinngornissaata piviusunngortinnissaa siuttuuffigerusukkatigu, taamaattumik tunngaviusumik tunngavisumik inatsiseqalernissamik suliaqarnerup paamaarussaavallaartumik suliarineqarnerata pimoorunnerullugu aamma uatsinnut upperinerulluta tatiginerullutalu suleqatigiinnerunissarput partiinut tamanut kaammattuutingaarput.

Nunatta aqunneqarnera nunatsinni pissutsinut, inuinit kulturitsinnut oqaatitsinnullu naapertuuttumik naleqqussarneqartariaqarpoq inuttaasut pisariaqartitaat naapertorlugit, tikisitanummi naleqqussartu-

aannarsinnaangilagut, maani nunatsinni pinngortitaq avatangiisivullu kusanartorsuit, kisiannili aamma ilaatigut peqqarniissinnaasartut siulitta atorsimasaat uatsinnullu kingunutassanngortissimasaat eriaringilluinnartariaqarpavut.

Taamalu naatsumik oqaaseqarluta suliap taama isikkoqarluni aappassaanneerseqarnissaa inassuti-ngaarput – qujanarlu suleqatigiissimanitsinnut.

Anthon Frederiksen